

Herbert – il mountainbiker grischun

■ (rtr) **Sper ils capricorns Gian e Giatgen duai uss era il ciclist Herbert far furore en il turissem. Herbert duai d'aver il pli enconuscent mountainbiker dal Grischun e raquintar als giasts da sias turas, da las dimoras en ils hotels ed era da purschidas novas ed uschia carmalar ils giasts.** Herbert

enconuscha quasi tuttas turas da mountainbike en il Grischun, è stà giast en bunamain mintga hotel ed el enconuscha tuttas purschidas ed occurrenz per ils amis dal mountainbike en il chantun. Herbert n'è dentant betg i sez cun velo u ha pernottà en tut ils hotels, pertge Herbert na datti atgnamain betg. El è ina persuna inventada, in camarat da viadi virtual per ils fans da mountainbike. Herbert stat per la plattafurma nova d'infurmaziun cumpletta per ils amis da mountainbike. In'idea da l'interpresa Swiss Sports Publishing GmbH da Tavau. Cumenà ha tut gia avant in temp sut il titel da lavur «Flow Country Graubünden». Per il bab spirtal da l'idea e mainagestium da l'interpresa, *Thomas*

Giger, èsi stà cler ch'i dovria in'auter titel. «Nus avain tschertgà insatge frestg, insatge nov. Turissem è ina fatschenta da pievel, e nus avain vulì crear ina persuna. Sco num avain nus elegì Herbert», raquinta Giger.

Purschida complessiva

Il portal Herbert cumpiglia tuttas purschidas da mountainbike en il Grischun ch'ins po lu era gist reservar. Integrads en la pagina èn ils hotels da bike grischuns, ina gronda rimnada da turas (singletrails), cartas e cudeschs da mountainbike u ditg curt: tut quai ch'ìls adherents da quest sport dovran per far lur turas en il Grischun. Herbert è dentant er in blogger e raquinta da tut quai che capita en il Grischun davart la scena da mountainbike.

430 000 francs dal chantun

L'idea d'ina rait da purschidas e competenzas per mountainbikers ha era persvadi il cussegl da turissem dal Grischun. Lez ha lura proponì a la regenza grischuna da sustegnair il project,

che custa en total radund 3,5 milliuns francs, cun daners or dal program da turissem 2014–2021. «Herbert» surgegn dal chantun en total 430 000 francs repartgids sin quatter onns. Sco pitschna firma dovrian els la contribuiziun dal chantun per pudair pladir persunas che gidan da laschar nescher e sviluppar Herbert, di Giger. Ils 16 da mars, gist il di dal num da Herbert, va il portal herbert.bike online e la fin da mars vegnan publicadas las pli novas purschidas, tranter auter ils «hammerdays» u il «Circolino-Bicicletta» a Flem, in festival da mountainbike per famiglias. L'interpresa Swiss Sports Publishing lascha ussa l'emprim nescher e crescher il mountainbiker Herbert. Sche Herbert surgegn lu in di fragliuns per auters sports (skis, passlung, viagiari) saja anc avert, di Giger. Sper la pagina d'internet datti er anc ina revista, in magazin da Herbert, che vegn edì mintgamai il december. Tenor Giger veglian els uschia mussar als giasts gia l'enviern quant bella la cuntrada grischuna è durant la stad.